



Nunatsinni nammineq immiorneq inerteqqutaajunnaarsinneqarluni immiassanillu eqqussisoqarsinnaalerneratigut inuiaqatigiinni qanoq sunniuteqarsinnaanera pillugu apeqquteqaat aallaavigalugu oqallisissiasatut siunnersuut.
(Atassutip Inatsisartuni ilaasortaataitai)

Demokraatini tunngaviusutut isumaqarpugut, innuttaasoq kinaluunniit sapinngisamik nammineq qanoq inuunissaminik aalajangiinissaminut kiffaanngissuseqassasoq. Pisortat sapinngisamik ikinnerpaanik killilersuisariaqarput. Ajoraluartumilli ullutsinni Kalaallit Nunaanni imaappoq, pisortat akuliussortarnerat annertuunut sumininnguanullu. Taamaaliornikkut pisortat ingerlataat annertoreeqisoq inuiaqatigiit peqqissumik, kiffaanngissuseqartumik pissusissamisoortumillu ineriartornissaraluannut naalleraasarpoq.

Atassut isumaqatigaarput uani, nammineq angerlarsimaffimmi immiaaqqanik viinninillu immiorneq akuerisaasariaqartoq. Internettimi takussaaqaaq, atortunik akuutissanillu pisiniarfissat, aammattaaq malitassat ilitsersuutillu videot amerlasuut takusassaallutik, kikkunnit tamanit aaneqarsinnaasut. Taamaammat inerteqqutigineqarsinnaangilluinnarput tamakku.

Ullumikkummi imaareerpoq, maani nunami immiortoqartarluni. Inerteqqutaasumilli taamaaliortoqartarpoq akussaangikkaluit immiornermilu atortussaangikkaluit atorlugit. Tamanna toqunartortortitaanermik kinguneqarsinnaavoq, ajornerpaagunilu kinguneqarsinnaalluni, assersuutigalugu tappigerneramik ajornerpaarpaarpallu toqumik kinguneqarsinnaalluni.

Naalakkersuisut akissumminni tikkuarpaat, siunnersuut imigassatornerup annertusineranik kinguneqarsinnaasoq kingunerisinnaallugulu imigassatornerup kinguneranik nappaateqartut amerlinerinik aammalu imigassatornerup kingunerisaanik persuttaanerit annertusinerinik.

Tassani Demokraatit eqqissisaasariaqarput. Immiaaqqanik viinninillu angerlarsimaffinni immiorneq innuttaasunut amerlanerpaanut, misileerusuttunut, aliikkutaralugu aammalu nuannariinnarlugu iliornerussaaq, inunnillu imigassamik ajornartorsiuteqanngitsunit suliarineqassalluni. Inunnit imigassamik ajornartorsiuteqartunut, immiornerup ammaanqarnera isumalerujussuussanngilaq, taakkumi qanorluunniit imigassatik pissarsiarissaqqaarmatigit, taakkumi pinngitsuuisinnaajunnaarnikuugamik.

Allaangilaq, Peqqissutsimut Naalakkersuisup innuttaasut tatiginngikkai. Persuttaaneq, kinguaassiuutitigut atornerluinerit, imminut toqunnerit, kræftimik nappaateqalernerit, uummatip taqarsuatigut ajornartorsiuteqalernerit allallu oqaluserissallugit ingasappallaaqaaq, uaniami ajortumik isumaqarani siunnersuutigineqarpoq kalaallit nunaanni innuttaasut pitsassuit nammineerlutik immiaaqqanik viinninillu immiorsinnaalernissaat. Innuttagut tatigilaartigit, inuunertik nammineerlutik ingerlallugu, namminneq kissaatigisaattut. Nunatsinni kiffaanngissuseq annertusartigu, aammaasiit naalagaaniartutut pissusilersornata.

Tassalu Demokraatit oqallinnermut isummersuutaat.